

कर जोड़ खड़ी तेरे द्वार पड़ी,
मेरी सुण लेवो पुकार,
लीले घोड़े वाला हो ज्या लीले असवार ॥

ताती तवसी धरती, बळण लाग्या टीबड़ा,
सारै गैळै आयी मैं तो, गाती तेरा काकड़ा,
मेरै पगां मं ऽऽऽ पड़ गया फाळा,
अब तो भुजा पसार ॥(१)॥
लीले घोड़े वाला हो ज्या लीले असवार ॥

ऊंची सी टीबड़ी पै, देख कै अकेली नार,
ढळती सी टीबड़ी पै, गैळ होग्या धाड़ी चार,
च्यारूं मेर ऽऽऽ अंधेरो होग्यो,
म्हां रै बेशुमार ॥(२)॥
लीले घोड़े वाला हो ज्या लीले असवार ॥

ऊबी रोवै बामण री, कोई तो बचाल्यो आज,
तेरै सामणै ओ ठाडा, लुट रयी मेरी लाज,
अब तो ऽऽऽ पळक उघाड़ मेरे दाता,
चाळ पडयो भरतार ॥(३)॥
लीले घोड़े वाला हो ज्या लीले असवार ॥

आयी ही बेटो लेवण, सरवस दे चाली ओ,

लेकर गठजोड़ो आयी, एकळी चाली ओ,
है यो ऽऽऽ न्याय तेरो तो मैं भी,
चाली चुडळो उतार ॥(४) ॥
लीले घोड़े वाला हो ज्या लीले असवार ॥

गांव सारो बरज्यो मनै, बरजतां आग्यी मैं,
सासु अर सुसरो जी रै, निजरां मं छाग्यी मैं,
शरणै आयां री ऽऽऽ लाज हाथ तेरै,
रख ले ओ करतार ॥(५) ॥
लीले घोड़े वाला हो ज्या लीले असवार ॥

कदै नीं देख्यो मैं तो, कस्यो होवै सासरो,
पहैळी पोत तेरै आग्यी, ले कै तेरो आसरो,
ऐस्यो ऽऽऽ थो कसूर के मेरो,
लेई चुनड़ी उतार ॥(६) ॥
लीले घोड़े वाला हो ज्या लीले असवार ॥

देव तनै मानकर मैं, आग्यी जग छोड़ कै,
ऐस्यो तो भरोसो नीं थो, जास्यूं पल्लो झाड़ कै,
मत सोवै ऽऽऽ दातार श्याम यहां,
मच रयी घोरम धार ॥(७) ॥
लीले घोड़े वाला हो ज्या लीले असवार ॥

दुनिया तो बोळै सारी, श्याम बड़ो दाता है ।
रीती झोळी नै भर दे, भाग्य विधाता है ।
मेरी ऽऽऽ बरियां क्यां मं बड़ग्यो,
सुण के सिरजनहार ॥(८) ॥

लीले घोड़े वाला हो ज्या लीले असवार ॥

इतणी पुकार सुणी, दीन बंधु दीनानाथ,
ळीळै पै चढकै चाल्यो, नंगी तळवार हाथ,
अंजनी रो ऽऽऽ लियो लाल साथ मं,
मोर छड़ी सिरदार ॥(९)॥
लीले घोड़े वाला हो ज्या लीले असवार ॥

चुग चुग कै धाड़ी मारया, अन्न धन खोस्यो जाय,
रोती बामण री हांसी, मरयोडै नै दियो जिवाय,
मोर छड़ी ऽऽऽ रो झाड़ो दीन्हो,
खडचो करयो भरतार ॥(१०)॥
लीले घोड़े वाला हो ज्या लीले असवार ॥

मगन बामण री नाचै, बोळै छै जय जयकार,
सब कोई आज्यो आं रै, सांचो छै यो दरबार,
बिगड़ी ऽऽऽ बात बणावै छै यो,
अटकी नै करता पार ॥(११)॥
लीले घोड़े वाला हो ज्या लीले असवार ॥

कर जोड़ खड़ी तेरे द्वार पड़ी,
मेरी सुण लेवो पुकार,
लीले घोड़े वाला हो ज्या लीले असवार ॥

प्रेषक विवेक अग्रवाळ जी ।

१०३८२८८८१५

Source:

<https://www.bharattemples.com/kar-jod-khadi-tere-dwar-padi-meri-sun-lo-pukar/>



Bharat Temples

Complete Bhajans Collections - Download Free Android App

<https://play.google.com/store/apps/details?id=com.numetive.bhajans>

Facebook: <https://www.facebook.com/bharattemples/>

Telegram: <https://t.me/bharattemples>

Youtube: <https://www.youtube.com/channel/UC24oJCxZJyhhKzSUD-Lt9Tw>